



PRESVLAČENJE

(Ili da Bog da šćeri...)

Kao što znate, mi uporno već godinama pokušavamo da budemo ono što nam i ime kaže - časopis o biznisu. Malo sam se iznenadila kada sam nekidan "popila" blagu kritiku da se bakćem politikom i političarima. Morala sam da objašnjavam da je u ovoj našoj BiH sve do miliona biznis, a sve preko toga politika, morala sam objašnjavati da ta granica opasno sklizne naniže (npr. kada vam u općini iliti opštini izmisle problem kod izdavanja neke saglasnosti samo da bi ga efikasno riješili i naravno naplatili...), i da se samo jednoj stvari čudim više od naše prirode - a to su strani investitori u ovoj zemlji. Mada je statistika za ovu a i prošlu godinu katastrofalna jer pad direktnih stranih investicija poprima kataklizmične razmjere, niko od naših političara, nevladinih organizacija, superhikovih eksperata (ovo je da se malo nasmejemo makar i gorko jel') i inih To Be političara ni da se počeše. A i što bi ? Kao što znamo tuđa ruka svrab ne češe, a pošto sve pobrojane podvrste homo bosniakusa ne zarađuju plaću nego je uredno iz ovog ili onog budžeta dobijaju, iluzorno je očekivati da bar mrdnu znate već čim...

I opet ima investitora ima. Evo recimo imate tamo neke imperijalističke Slovence koji su dobili okolišnu dozvolu za gradnju malih hidrocentrala. Rezultat - protesti u Sarajevu gdje se traži da se hitno i bezbeli revolucionarno dozvola ukine, a investitor "težak" više desetina miliona konvertibilnih maraka pod hitno šutne tamo odakle je i došao. Poželjno bez dobrog dijela para koje je donio...

Cimos npr. zbog slabe produktivnosti, očajnog poslovnog okruženja, i svojih problema premješta veliki dio proizvodnje iz BiH u susjednu Srbiju i umjesto da se zapitamo zašto je to tako, naš dežurni perač mozga preko cijele stranice kuka kako "Slovenci voze mašine iz BiH" i to baš onako seljački bezobrazno kao da mu ih je babo tamo ostavio a nisu Slovenci platili i donijeli.

I ima jos hejbet takvih primjera iz kojih je bjelodano jasno šta je to što nam više nego dobro ide - "presvlačenje" stranih investitora, po staroj narodnoj "dok te mamim šećerom te hranim, a kad te namamim i hljeb ti zabranim ..". Ko ne vjeruje neka pita VW Sarajevo, ine investitore u male hidroelektrane, investitore u solarnu i vjetroenergiju koji, iako nema zakonske regulative i neće je, bar u Federaciji BiH, biti još bar godinu i po, hrle kao leptiri na lampu nadajući se da će nekim čudom (koje je obično vezano za sličice američkih predsjednika...) naši zakonodavci iz šešira izvući zeca baš po njihovoj mjeri i ukusu.

E sad, kako rekoh na početku, da Bog da šćeri da te aga uzme al'... **B**

Aida Delić,
glavna i odgovorna urednica